

# 1. Ընդհանուր դրույթներ

- 1.1. «Ազատ ուսանողների ֆորում» ուսանողական միությունը (այսուհետ՝ Ֆորում) «Քաղաքացիական գիտակցություն» ազատական հասարակական կազմակերպության (այսուհետ՝ «ՔԳ» ԱՀԿ) գաղափարական սկզբունքների հիման վրա և իր անդամների շահերի ընդհանրությամբ ստեղծված կամավոր միավորում է:
- 1.2. Ֆորումը ստեղծվել է «ՔԳ» ԱՀԿ Խորհրդի որոշմամբ, հանդիսանում է «ՔԳ» ԱՀԿ կառուցվածքային ստորաբաժանում:
- 1.3. Ֆորումն իր գործունեության ընթացքում ղեկավարվում է Հայաստանի Հանրապետության Սահմանադրությամբ, Հայաստանի Հանրապետության այլ իրավական ակտերով, «ՔԳ» ԱՀԿ Կանոնադրությամբ և սույն Կանոնադրությամբ:
- 1.4. Ֆորումը գործում է Հայաստանի Հանրապետության ողջ տարածքում:
- 1.5. Ֆորումի անդամների և «ՔԳ» ԱՀԿ-ի միջև հարաբերությունները կարգավորվում են «ՔԳ» ԱՀԿ Կանոնադրությամբ և սույն Կանոնադրությամբ:
- 1.6. Ֆորումի անդամների միջև հարաբերությունները կարգավորվում են սույն Կանոնադրությամբ:
- 1.7. Ֆորումի հայերեն ամբողջական անվանումն է՝ «Ազատ ուսանողների ֆորում» ուսանողական միություն:
  - Ֆորումի հայերեն հապավումն է՝ «ԱՈՒՖ» ՈՒՄ:
  - Ֆորումի անգլերեն ամբողջական անվանումն է՝ “Free Students’ Forum” Students’ Union:
  - Ֆորումի ռուսերեն ամբողջական անվանումն է՝ студенческий союз “Форум Свободных Студентов”:

## 2. Ֆորումի նպատակները և խնդիրները

### 2.1. Ֆորումի հիմնական նպատակներն են՝

- ներկայացնել և պաշտպանել ուսանողության իրավունքներն ու շահերը,
- նպաստել ուսանողության իրավական, քաղաքական և քաղաքացիական գիտակցության, ինչպես նաև գիտակրթական մակարդակի բարձրացմանն ու զարգացմանը:

### 2.2. Ֆորումի հիմնական խնդիրներն են՝ օրենքով սահմանված կարգով՝

- հետևողական լինել ուսումնական հաստատություններում տեղի ունեցող խախտումներին, բարձրաձայնել դրանց մասին և համապատասխան քայլեր ձեռնարկել դրանց վերացման շուրջ,
- ներկայացնել և պաշտպանել ուսանողների իրավունքները և շահերը ուսումնական և այլ հաստատություններում, ինչպես նաև պետական կառավարման և տեղական ինքնակառավարման մարմիններում,
- համախմբել ուսանողությանը Ֆորումի նպատակների և ծրագրերի իրականացման շրջանակներում:

### 2.3. Ֆորումն իր նպատակների և խնդիրների իրականացման համար՝ Հայաստանի Հանրապետության օրենսդրությամբ սահմանված կարգով իրականացնում է հետևյալ գործառույթները՝

- կրթական համակարգի բարելավմանն ուղղված նախագծերի մշակում,
- ուսումնական ծրագրերի իրականացում դասընթացների, սեմինարների տեսքով,
- հետազոտությունների և վերլուծությունների իրականացում,
- հրատարակչական աշխատանքի իրականացում,
- հրապարակային միջոցառումների անցկացում,
- Ֆորումի նպատակների և խնդիրների իրականացմանն ուղղված այլ գործառույթների իրականացում:

### **3. Ֆորումին անդամագրվելու և անդամագրումից դուրս գալու կարգը**

- 3.1. Ֆորումին կարող է անդամագրվել ուսումնական հաստատություններում սովորող յուրաքանչյուր ուսանող, որն ընդունում է Ֆորումի Կանոնադրությունը, նրա նպատակներն ու խնդիրները և ցանկանում է մասնակցել նրա գործունեությանը:
- 3.2. Անդամագրումն իրականացվում է «ՔԳ» ԱՀԿ Կանոնադրությամբ սահմանված կարգով՝ Խորհրդի որոշմամբ՝ անձի համապատասխան դիմումի հիման վրա:
- 3.3. Անդամությունը կարող է դադարեցվել դիմումի համաձայն կամ «ՔԳ» ԱՀԿ Խորհրդի, կամ Ֆորումի Խորհրդի որոշմամբ, եթե Ֆորումի անդամը թույլ է տվել Ֆորումի կամ «ՔԳ» ԱՀԿ Կանոնադրության խախտում, կամ Ֆորումի բարի համբավն արատավորող արարք:
- 3.4. Անդամությունը դադարեցնելու մասին Ֆորումի Խորհրդի որոշումները պետք է հաստատվեն «ՔԳ» ԱՀԿ Խորհրդի ուսանողական ոլորտի պատասխանատուի կողմից:
- 3.5. Ֆորումի անդամը, որի մասնակցությունը դադարեցվել է Ֆորումի Խորհրդի որոշմամբ, իրավունք ունի բողոքարկել իր հեռացման հարցը Ֆորումի Խորհրդում կամ «ՔԳ» ԱՀԿ Խորհրդում:

### **4. Ֆորումի անդամների իրավունքները և պարտականությունները**

- 4.1. Ֆորումի անդամն իրավունք ունի՝
  - մասնակցել Ֆորումի Խորհրդի նիստերին, որին վերջինս մասնակցում է խորհրդակցական ձայնի իրավունքով,
  - ընտրվել Ֆորումի ղեկավար մարմիններում,
  - Ֆորումի նպատակների և խնդիրների իրականացման համար դիմումներ և առաջարկություններ ներկայացնել Ֆորումի ղեկավար մարմիններին,
  - ստանալ տեղեկատվություն Ֆորումի գործունեության մասին,
  - ազատ դուրս գալ Ֆորումի անդամությունից:
- 4.2. Ֆորումի անդամը պարտավոր է՝

- մասնակցել Ֆորումի գործունեությանը,
- նպաստել Ֆորումի նպատակների և խնդիրների իրականացմանը,
- վճարել սույն Կանոնադրությամբ սահմանված անդամավճարները,
- կատարել Ֆորումի կանոնադրական պահանջները, Ֆորումի ղեկավար մարմինների որոշումները:

## **5. Ֆորումի կառուցվածքը**

**5.1.** Ֆորումի կառուցվածքային մարմիններն են՝

- Ֆորումի Գերագույն Խորհուրդը,
- Ֆորումի Խորհուրդը (այսուհետ՝ ՖԽ):

**5.2.** Ֆորումի Գերագույն Խորհրդի և ՖԽ-ի գործունեության կանոնակարգերը հաստատում է «ՔԳ» ԱՀԿ Խորհուրդը:

## **6. Ֆորումի Գերագույն Խորհուրդը**

**6.1.** Ֆորումի Գերագույն Խորհուրդը հանդիսանում է Ֆորումի բարձրագույն մարմինը, որը սահմանում է Ֆորումի գործունեության գլխավոր խնդիրները և ուղղությունները:

**6.2.** Ֆորումի Գերագույն Խորհուրդը բաղկացած է «ՔԳ» ԱՀԿ նախագահից, «ՔԳ» ԱՀԿ Խորհրդի ուսանողական ոլորտի պատասխանատուից և Ֆորումի Խորհրդի անդամներից:

**6.3.** Ֆորումի Գերագույն Խորհուրդը հրավիրվում է յուրաքանչյուր 6 ամիսը մեկ անգամ՝ «ՔԳ» ԱՀԿ նախագահի կողմից:

**6.4.** Ֆորումի Գերագույն Խորհրդի արտահերթ նիստ կարող է հրավիրել Ֆորումի Գերագույն Խորհրդի նախագահողը, Ֆորումի Խորհուրդը՝ իր կամ Ֆորումի անդամների 1/3-ի գրավոր պահանջով, կամ «ՔԳ» ԱՀԿ Խորհուրդը:

**6.5.** Ֆորումի Գերագույն Խորհրդի նիստերի նախագահող է համարվում «ՔԳ» ԱՀԿ նախագահը, իսկ քարտուղար՝ «ՔԳ» ԱՀԿ Խորհրդի ուսանողական ոլորտի պատասխանատուն:

**6.6.** Ֆորումի Գերագույն Խորհրդի բացառիկ իրավասությանն են վերապահվում՝

- Ֆորումի կանոնադրության հաստատումը, նրանում փոփոխություններ և (կամ) լրացումներ կատարելը, նոր կանոնադրության հաստատումը,
- Ֆորումի Գերագույն Խորհուրդը լսում և գնահատում է Ֆորումի Խորհրդի հաշվետվությունը՝ կատարված աշխատանքների վերաբերյալ,
- Ֆորումի Խորհրդի կազմի հաստատումը,
- Ֆորումի Խորհրդի պաշտոնավարման ժամկետի սահմանումը,
- Ֆորումի գործնեության և կառավարման վերահսկողությունը:

6.7. Հերթական Գերագույն Խորհրդի նիստ հրավիրելու՝ սույն կանոնադրությամբ սահմանված ժամկետները խախտելու դեպքում, Գերագույն Խորհրդի նիստը հրավիրվում է «ՔԳ» ԱՀԿ Խորհրդի կողմից:

6.8. Ֆորումի Գերագույն Խորհրդի նիստն իրավագոր է, եթե նիստին մասնակցում են «ՔԳ» ԱՀԿ նախագահը, «ՔԳ» ԱՀԿ Խորհրդի ուսանողական ոլորտի պատասխանատուն, Ֆորումի Խորհրդի նախագահը և Ֆորումի Խորհրդի անդամների առնվազն 2/3-ը:

## **7. Ֆորումի Խորհուրդը, նրա իրավագորությունը և որոշումների ընդունման կարգը**

7.1. Ֆորումի Խորհուրդը (այսուհետ՝ ՖԽ) Ֆորումի գործադիր մարմինն է: ՖԽ անդամների կազմը ներկայացվում է «ՔԳ» ԱՀԿ Խորհրդի ուսանողական ոլորտի պատասխանատուի կողմից, որը հաստատվում է Ֆորումի Գերագույն Խորհրդի նիստում:

7.2. ՖԽ-ն կազմված է ՖԽ նախագահից և ՖԽ անդամներից:

7.3. ՖԽ-ի նախագահն ընտրվում է ՖԽ անդամների կազմից՝ ՖԽ անդամների ձայների պարզ մեծամասնությամբ:

7.4. ՖԽ-ն իր աշխատանքները համակարգում է նիստերի ձևով, որոնք հրավիրվում են ՖԽ նախագահի կողմից ոչ ուշ, քան ամիսը մեկ անգամ:

7.5. ՖԽ արտահերթ նիստ կարող է հրավիրել ՖԽ նախագահն իր նախաձեռնությամբ կամ Ֆորումի անդամների 1/3-ի գրավոր պահանջով, կամ ՖԽ անդամների 1/3-ի պահանջով, կամ «ՔԳ» ԱՀԿ Խորհրդի ուսանողական ոլորտի պատասխանատուի պահանջով:

7.6. ՖԽ-ն ղեկավարում է Ֆորումի գործունեությունը Ֆորումի Գերագույն Խորհրդի նիստերի միջև ընկած ժամանակահատվածում:

7.7. ՖԽ նիստը իրավագոր է, եթե նիստին մասնակցում են ՖԽ անդամների առնվազն 2/3-ը:

7.8. ՖԽ-ի որոշումներն ընդունվում են ՖԽ անդամների ընդհանուր թվի ձայների պարզ մեծամասնությամբ: Ձայների հավասարության դեպքում նախագահի (նրա բացակայության դեպքում՝ նիստը վարողի) ձայնը վճռորոշ է:

7.9. ՖԽ-ն՝

- քննարկում և լուծում է Ֆորումի կառավարմանը և գործունեությանը վերաբերող հարցերը, բացառությամբ Ֆորումի Գերագույն Խորհրդի բացառիկ իրավասությանը վերաբերող հարցերի,
- ուսումնական հաստատություններում ստեղծում է (լուծարում է) մասնաճյուղային ակումբներ, Ֆորումի անդամներից նշանակում է (ազատում է) մասնաճյուղային ակումբների համակարգողներ,
- Ֆորումի նպատակներին և խնդիրներին համապատասխան առանձնացնում է ոլորտներ և Ֆորումի անդամներից նշանակում է ոլորտի պատասխանատուներ,
- Ֆորումի Գերագույն Խորհրդին ներկայացնում է Ֆորումի կանոնադրության մեջ փոփոխություններ և (կամ) լրացումներ կատարելու և (կամ) նոր կանոնադրության առաջարկություն: Նման առաջարկությամբ հանդես գալու իրավունք ունի «ԲԳ» ԱՀԿ Խորհրդի ուսանողական ոլորտի պատասխանատուն,
- հետ է կանչում ՖԽ նախագահին անդամների 2/3-ի պահանջով, որը հաստատվում է Ֆորումի Գերագույն Խորհրդի նիստում,
- Ֆորումի գործառույթներն իրականացնելու նպատակով անհրաժեշտության դեպքում սահմանում է անդամավճարներ,
- իր գործունեությունը կառուցում է օրինականության, հավասարության, հրապարակայնության, հաշվետվողականության և փոխօգնության սկզբունքների վրա,
- ընդունում է Ֆորումի նպատակների և խնդիրների իրականացմանն ուղղված այլ որոշումներ:

7.10. ՖԽ նախագահը՝

- անհրաժեշտության դեպքում ՖԽ կազմից նշանակում է փոխնախագահ և քարտուղար,
- ղեկավարում է ՖԽ-ի աշխատանքները, նախագահում է ՖԽ նիստերը,
- ներկայացնում է Ֆորումն այլ մարմինների հետ հարաբերություններում,
- ապահովում է ՖԽ-ի կապը «ԲԳ» ԱՀԿ Խորհրդի հետ,
- հաշվետու է Ֆորումի Խորհրդին և «ԲԳ» ԱՀԿ Խորհրդին,
- սույն կանոնադրությամբ սահմանված կարգով հրավիրում է ՖԽ-ի հերթական և արտահերթ նիստերը, ձևավորում է նիստերի օրակարգը,
- ՖԽ-ին և «ԲԳ» ԱՀԿ Խորհրդին ապահովում է անհրաժեշտ տեղեկատվությամբ:

## **8. Ֆորումի վերակազմավորման և լուծարման կարգը**

**8.1.** Ֆորումի վերակազմավորման և լուծարման բացառիկ իրավունքը պատկանում է «ԲԳ» ԱՀԿ Խորհրդին, որն իրականացվում է «ԲԳ» ԱՀԿ Կանոնադրությամբ սահմանված կարգով: